

Fasnacht 2018

Blagèèr



e VSG Bangg

Ich stand in der Muttengerkurve wenn i Rummel will
Will ich Basler gseh gang ich uf Weil dert hogge viel
zum Schmuse gang ich in e Club für Swingerli
und zum einsam sii ins Läuferfingerli

Als Blageeri, sie do schaff i gärn
An Ruhestand z dängge liggt mer färn
Im Vertraue gsait ich kaas eych saage
I muess schaffe bis mir ufs Hörnli traage

Bi so Naturkatastrophe ha mi gfrogt?
Zeigt dr Petrus em Trump, wo Gott wirklich hoggt
Ich weiss wo Gott hoggt, wänn mr wette
Momentan bi mir dehei am Glette

Ihri Laischtig isch sie, duet nit aggere
Wenn d Ackermäa schwätzt duet die nur gaggere
Ich als Bänggler, ich loh nit lugg
und wünsch mer dr Guy Morin zrug

In der EU isch bald fertig mit Grossbritannien
Katalonie will wäg vo Mamma Spania
Vo mir us, ich saag eych, ich wär parat
Machet us em Gläibasel schnäll e eigne Staat

Ich mach Hochsprung, Witsprung und Triathlon
Ich gump, ich spring tranier au Marathon
Ich will nit an d Olympiade fliege
aber s'näggscht Drämmli muess i Gopferdegge kriege

Alle muess politisch korrägg si, ich sag Gopf
Eiswisschum mit Schoggihuube, statt Moorekopf
Meitlibei dörfsch nüm saage, ich bi greizt
saag ich halt „Haselnussgebäck starggesprait“

Oberholzer Susann und Pegoraro Sabine
Klääbe scho ewig ufem Sässel, so duet das schiine
Wurum hett no kaine KESB informiert
Die gheere doch scho lang Zwangsplaziert

Basel tiggt anderschd do druff sinn mir stolz
Mir Bebbi sinn eifach us bsunderem Holz
aber wenn mr dr Wessels nit bald in Wieschti schigge
Heert Basel näggschtens ganz uf tigge.

z Basel isch e Schwoobezug us de Glais usegsprunge
Wurum? Das isch jetzt duuredrunge
Dr Grund isch klar, i kas dir verzelle
Das Zügli het nit nach Ziiri welle

Dr Matthias Hüppi isch Präsidänt vom FC St. Galle
Dr Alain Sutter isch dert verantwortligg fyr Drugg
in de Balle
Dr Sven Epiney ybernimmt s'Catering, so viil ich waiss
So bliebe schiints die Würschtli immer haiss

Dr Buur vo Tecknau ka nimme mälche und mischte
Sit Wuche scho hoggt er nämlig in dr Kische
vor em Mälche het är dere Kuhe s Utter griibe
und dass Lisi het «metoo» uff Twitter gschriibe

Wottsch au by uns bänggle?

Uff www.vsg-basel.ch erfahrsch meh!

